

Morning Dogri (NSD) National News Bulletin 05-09-2024

आकाशवाणी

- प्रधानमंत्री नरेन्द्र मोदी होर सिंगापुर दे प्रधानमंत्री लॉरेंस वोंग हुंदे नै गल्लबात कीती ऐ।
- मुख्य भरै च अज्ज राष्ट्रीय शिक्षक दिवस मनाया जा'रदा ऐ। राष्ट्रपति द्रौपदी मुर्मू होर अज्ज राष्ट्रीय शिक्षक पुरस्कार भेंट करगंन।
- जम्मू कश्मीर च विधानसभा चुनां दे त्रीए ते खीरी गेड दे मतदान लेई अधिसूचना अज्ज जारी कीती जाग।
- आंध्रप्रदेश दे हाड़ प्रभावत इलाकें दा जायजा लैने लेई अज्ज इक अंतर-मंत्रालीय केन्द्री टीम उत्थूं दे दौरे पर जा'रदी ऐ।
- भारतीय तीरांदाज हरविंदर सिंह पैरालंपिक च सुन्ने दा तगमा जित्तने आले पैहले भारतीय पैरा तीरांदाज बनी गे न।



PM-Singapur

प्रधानमंत्री नरेन्द्र मोदी होर अज्ज सिंगापुर दे प्रधानमंत्री लॉरेंस वोंग हुंदे नै गल्लबात कीती ऐ। दवै नेता भारत-सिंगापुर रणनीतिक सांझेदारी दी समीक्षा करगंन ते आपसी हित दे इलाकाई ते कुलसंसारी मुद्दें पर बचारे गी आपू'चै सांझे करगंन। ब्रुनेई दी अपनी कामयाब यात्रा दे समापन मगरा मोदी होर कल लायन सिही सिंगापुर पुज्जे। सिंगापुर दे प्रधानमंत्री होरें उंदे सम्मान च निजी रात्रि-भोज दी मेलबानी कीती। इक सोशल मीडियो पोस्ट पर श्री मोदी होरें जिक्र कीता जे श्री वोंग हुंदे नै केई मुद्दें पर उंदी महत्वै आली चर्चा होइ ऐ। सुआस्थ ते मैडिसिन्स, हुनर विकास ते भारत-सिंगापुर सैमीकंडक्टर भागीदारी दे क्षेत्र च सैहयोग लेई दौनें मुख्यें बशकार समझौता पत्र पर दस्तखत बी कीते गे न। एह्दे थमां पैहले प्रधानमंत्री मोदी होरें गी सिंगापुर दे पार्लियामेंट हाउस च उंदे औने लेई उंदा सुआगत कीता।

प्रधानमंत्री मोदी होर अज्ज सिंगापुर दे राष्ट्रपति ते होर दुए मन्ने—परमन्ने दे लोंकें कन्नै बी बैठक करगंन। ओह सिंगापुर दे मुख् कार्यकारी अधिकारिएं कन्नै बी गल्लबात करगंन।

<><><><><><><>

Rev. Prez.-Teacher

राष्ट्रपति द्रौपदी मुर्मू होर अज्ज शिक्षक दिवस दे मौके पर नमीं दिल्ली दे विज्ञान भवन च लगने आले इक समारोह च 82 अध्यापकें गी राष्ट्रीय शिक्षक पुरस्कार 2024 कन्नै सम्मानित करगंन। आकाशवाणी दिल्ली आस्सेआ इस कार्यक्रम दा सिद्दा प्रसारण एफ.एम.गोल्ड, दन्द्रप्रस्त ते आकाशवाणी लाईव न्यूज 24 इनटू 7 पर समां 4 बज्जियै 10एं मिटे पर कीता जाग। इस कार्यक्रम दा सिद्दा प्रसारण आकाशवाणी ए.आई.आर ते आकाशवाणी दे यूट्यूब चैनलें पर बी उपलब्ध रौहग। हर ब8रे 5 सितम्बर दा ध्याड़ा जेहड़ी जे साबका राष्ट्रपति डॉ. सर्व पल्ली राधा कृष्णन हुंदी जन्म जयंति ऐ, गी राष्ट्रीय शिक्षक दिवस दे रूपै च मनाया जंदा ऐ। केन्द्री शिक्षा मंत्रालय नै आखेआ ऐ जे राष्ट्रीय शिक्षक पुरस्कार देने दा मकसद देसे दे उनें खास टीचरें गी सम्मानित करना ऐ जिंदा शिक्षा दे क्षेत्र च बड़ा मता योगदान होंदा ऐ ते जेहड़े न छड़ा स्कूली शिक्षा दे मयार च सुधार करदे न, सगुआं विद्यार्थिएं दे जीवन गी बी अपनी मेहनत ते संपर्ण भाव कन्नै समृद्ध बनांदे न। स्कूली शिखा ते साक्षरता विभाग नै ऐकती राष्ट्रीय शिक्षक पुरस्कार लेई 50 टीचरें दी ताल कीती ऐ। एह ताल पूरी चाल्ली पारदर्शी ढंगै नै ते ऑनलाइन त्रऊं चरणें च जिला, राज्य ते राष्ट्रीय स्तर दी प्रक्रिया राएं कीती गई ऐ। उच्च शिक्षा विभाग दे 16 टीचर ते हुनर विकास ते उद्यमता मंत्रालय दे 16 टीचरें गी बी सम्मानित कीता जाग।

<><><><><><><>

President Teacher Day

राष्ट्रपति द्रौपदी मुर्मू होरें राष्ट्रीय शिक्षक दिवस दी पूर्व संजा कल सब्बने अध्यापकें गी शुभकामना दित्तियां। अपने इक ममारकी सनेए च राष्ट्रपति होरें आखेआ जे एह ध्याड़ा महान शिखा विद, विद्वान ते सांबा राष्ट्रपति डॉ. सर्वपल्ली राधा कृष्णन हुंदी जन्म जयंति ऐ। उनें श्रद्धांजलि भेंट करदे होई द्रौपदी मुर्मू होरें आखेआ जे डॉ. एस.राधा कृष्णन हुंदी जन्म जयंति आला दिन मनाया जंदा ऐ। उनेंगी श्रद्धांजलि भेंट करदे होई द्रौपदी मुर्मू होरें आखेआ जे डॉ. राधा कृष्णन समूलचे राष्ट्र लेई इक प्रेरणा न।

राष्ट्रपति होरें आखेआ जे बच्चे राष्ट्र दा भविक्ख हुंदे न ते अध्यापक विद्यार्थिं दे नेता दे रूपै च तैआर करदे होई राष्ट्र दा भविक्ख तैह् करने च महत्वपूर्ण योगदान दिंदे न। उनें आखेआ जे शिक्षकें दी जिम्मेदारी ऐ जे ओह विद्यार्थिं गी नैतिक मुल्ले-कदरें, तथ्यें पर अधारत ते आलोचनात्मक सोव, हुनर ते समाज लेई जिम्मेदारी दी भावना कन्नै लैस करन।

<><><><><><>

PM Teacher Day

प्रधानमंत्री नरेन्द्र मोदी होरें शिक्षक दिवस दे मौके पर अध्यापकें गी शुभकामना दित्तियां न। इक सोशल मीडियो पोस्ट च प्रधानमंत्री होरें सारे अध्यापकें प्रति आभार व्यक्त कीता जेहड़े युवा दे भविक्ख गी आकार दिंदे न। उनें साबका राष्ट्रपति डॉ. सर्वपल्ली राधा कृष्णन होरें गी उंदी जयंति दे मौके पर उनेंगी श्रद्धाजलि भेंट कीती। उंदी जयंति गी शिक्षक दिवस दे तौर पर मनाया जंदा ऐ।

<><><><><><>

3rd Phase Nomination

जम्मू कश्मीर च औंदे विधानसभा चुनां दे त्रीए गेड़ लेई अज्ज अधिसूचना जारी कीती जाग। इस गेड़ तैहत 40 विधानसभा हल्कें पर मतदान होग जिंदे च 24 जम्मू खित्ते दे ते 16 कश्मीर खित्ते दे न। इस गेड़ तैहत नामांकन भरने दी खीरी तरीक 12 सितम्बर ऐ। नामांकन पत्रें दी जांच आला कम्म 13 सितम्बर गी कीता जाग। मेदवार जेकर चाहन तां ओह 17 सितम्बर तगर अपना नामांकन वापस परताई सकदे न। त्रीए ते खीरले गेड़ लेई मतदान पैहली अक्तूबर गी होग। खीरले गेड़ च जम्मू जिले दी 11 विधानसभा सीटें, कठुआ दी 6, उधमपुर दी 4 ते सांबा जिले दी 3 सीटें पर मतदान होना ऐ। चुनां आयोग आस्सेआ जारी ताजा हिदायतें मूजब वोटें दी गिनतरी आला कम्म 8 अक्तूबर गी होना ऐ।

<><><><><><>

2nd Phase Nomination

जम्मू कश्मीर विधानसभा चुनां दे दूए गेड़ तैहत नामांकन भरने दी अज्ज खीरी तरीक ऐ। इस गेड़ तैहत 25 सितम्बर गी 26 विधानसभा हल्कें पर वोट पाए जाने न।

जिंदे च 15 कश्मीर खित्ते दे ते 11 जम्मू खित्ते दे हल्के शामिल न। नामांकन पत्रें दी जांच आला कम्म कल कीता जाग। जिसलै के मेदवार जेकर चाहन तां ओह 9 सितम्बर तगर अपनी नामजदगी वापस लेई सकदे न। जिनें 11 विधानसभा हल्कें पर वोट पाए जाने न उंदे च गुलाबगढ़, रियासी, श्री माता वैष्णो देवी, कालाकोट, सुंदरबनी, नौशेहरा, राजौरी, बुद्धल, थन्नामंडी, सुरनकोट, पुंछ हवेली ते मेंढर शामिल न। 18 सितम्बर गी 24 विधानसभा हल्कें पर वोट पाए जाने न। एहदे लेई लोड़चदे बंदोबस्त कीते गे न। मतदान अमले गी लोड़चदी सिखलाई दित्ती गई ऐ तां जे चुनां आजादाना, निरपक्ख ते शांतिपूर्ण माहौल च सम्पन्न होई सकन। जम्मू कश्मीर च असेंबली दे चुनां 10एं बरे दे वक्फे मगरा होआरदे न।

<><><><><><>

AP Flood Central

केन्द्री दी इक अंतरमंत्रालीय टीम अज्ज आंध्रप्रदेश दे हाड़ें थमां प्रभावत कृष्णा, एनटीआर, गुंटूर ते होरने इलाके दा दौरा करोग। इस टीम दी अगुवाई केन्द्री गृहमंत्रालय च आपदा प्रबंधन दे अतिरिक्त सचिव संजीव कुमार जिंदल होर करगंन। एह टीम उत्थें हाड़ें कारण होए दे नुक्सान दा जायजा लैग ते प्रभावतें कन्नै सिद्दे गल्लबात बी करोग। बंगाल दी खाड़ी च बने दे चक्रवाती दबाह दे दे चलदे आंध्रप्रदेश दे समुंद्री कंडे कन्नै लगदे केई जिलें च भारी बरखें कारण आम जनजीवन अस्तव्यस्त होई गोदा ऐ। मौसम विभाग नै नै ओंदे 48एं घेंटे तगर भारी बरखा दी पेशगोई ऐ।

<><><><><><>

Odisha Textile

केन्द्री कपड़ा उद्योग मंत्री गिरिराज सिंह होरें आखेआ ऐ जे भारत दा कपड़ा उद्योग बरे 2030 तगर बधियै 350 अरब डॉलर तगर पुज्जने दी संभावना ऐ। उनें आखेआ जे एहदे नै देसा च 3 करोड़ 5 लक्ख नौकरियां पैदा होंगन। भारत टैक्स 2025 दे आयोजन थमां पैहले श्री सिंह होरें मेद बुज्झी जे भारत गी विश्व च अपना भारत ब्रांड ते टिकाऊ पर्यावरण मुआफक कपड़ा उत्पादें कन्नै वैश्विक पंछान थहोग। उनें आखेआ जे कपड़ा उद्योग लेई केन्द्र सरकार दी उत्पादन कन्नै जुड़ी प्रोत्साहन योजना परिधान उद्योग च उत्पादन ते ब्रांडिंग च सहायक होग।

<><><><><><>

Paraolmpics

पैरिस पैरालंपिक च हरविंदर सिंह होरें मर्दे दे तीरांदाजी रिकर्व ओपन फाइनल च सुन्ने दा तगमा जित्तियै इतिहास रची दित्ता ऐ। ओह् पेरालंपिक जां ओलंपिक च सुन्ने दा तगमा जित्तने आले भारत दे पैहले तीरांदाज बने न। दूर्ई बक्खी मर्दे दे क्लब थ्रो एफ-51 दे फाइनल च धर्मवीर होरें 34.9-2 मीटर दी दूरी तैह् करियै एशियाई रिकार्ड त्रोड़ियै ते सुन्ने दा तगमा जित्तेआ ऐ। प्रणव सूरमा नै इस्सै मकाबले च 34.5-0 मीटर दी दूरी हासल करियै चांदी दा तगमा अपने नां कीता। पैरालंपिक खेड्डें दे अज्ज 8में रोज भारती टीम तीरांदाजी अभियान च शानदार प्रदर्शन दे कन्ने अभियानद ा समापन करने लेई उतरोग। भारती खडारिणं पैरालंपिक खेड्डें दे कुसै इक संस्करण च अजें तगर सब्बने शा मते तगमे जित्ती लैते दे न। इंदे च सुन्ने दे 5, चांदी दे 9 ते कैह् दे 10 तगमे शामिल न।

<><><><><><>